

INUIT ATAQATIGIIT

INATSISARTUNI



Nuuk, 30. november 2010

Inatsisartut suleriaasianni § 36, imm. 1 naapertorlugu matumuuna imaattunik Naalakkersuisunut apeqquteqarpunga:
(Inatsisartuni ilaasortaq Olga P. Berthelsen, Inuit Ataqatigiit)

Apeqqutit:

1. Illoqarfinni sorlarni Piginneqatigiilluni inissialiortitsinissaq takorloorneqarpa?
2. Illoqarfiit toqqarneqartussat suut tunngavigalugit toqqarneqassappat?
3. Illuut A/S qanoq ililluni illoqarfinni allani, piginneqatigiilluni inissialiortitsinermut atorineqarsinnaava?
4. Suna inatsit tunngavigineqarpa?

Tunngavilersuut:

Kalaallit Nunaanni illoqarfinni anginerneq sisamani, nammineq inigisassanik sanaartornerni Danmarkimi realkreditforningit aningaasaliisooqatigalugit sanaartorneq periarfissaavoq, taamaalillunilu inissiamik nammineq pigisamik, inuiaqatigiinnut aningaasatigut artukkiinnginnerusumik sanaartortoqartarluni.

Illoqarfinni anginerusuni najugaqanngikkaanni, namminerlu pigisamik initaarniaraanni periarfissat marluinnaapput. Siulleq nammineq tamakkiisumik akiliineq tulliatullu, sanaqatigiinneq tunngavigalugu tapiiffigitinneq.

Pissutsit ullumitut isikkoqartillugit, sinerissap sinnerani initaarniarneq, taamaalillunilu sanaartorneq aningaasatigut aporfissat anneruneratigut unikaallatsinneqaaqqavoq, taamaalillunilu illoqarfinni mikinerusuni, innuttaasut nammineq pigisaminnik inissiaateqarnissaminnut periarfissakinnerullutik.

Tamanna qaangerniartariaqarpoq innuttaasummi tamarmik, nunatsinni sortaaniikkaluarunik inissaqarnissaminnut piginnaatitaaffeqarput. Tamannalumi siunertaralugu Ineqarnermut Naalakkersuisoq, illoqarfinni allani piginneqatigiilluni inissialiortitsinissamik suliaqarniarluni nalunaarpoq.

Taamatut nalunaaruteqarnerup kingunerisaanik, qulaani apeqqutit saqqummiussakka akineqarnissaat kissaatigaara.